

# JEDAN GRAD, JEDNA BORBA

Piše ko zna, smije i umije; izlazi kad treba i mora; štampa se u kućnoj radinosti.

## SDA protiv SDA-Konakovića u SARAJEVU?

### Vitalni stranački interes: Koga je direktor, njega su i tenderi!

Skupština Kantona Sarajevo izglasala je 19. marta nepovjerenje vladi, što će rezultirati smjenom premijera Konakovića. Izjašnjavanje je tražila SDA, premijerova dojučerašnja stranka. I SDA i Konaković uzajamno głoženje oko plijena prikazuju kao sukob suštinski različitih politika.

### Uočite te drastične razlike između SDA i SDA/Narod&pravda!

ŠTA SU RADILI NAMA ZA NAŠE PARE	SDA (Vlada i Skupština KS)	Konaković (SDA/ Narod&pravda)
Pokušaj zatvaranja Opće bolnice u Sarajevu 2015. godine	<b>ZA</b>	<b>ZA</b>
Reforma zdravstva= pokušaj zatvaranja Zavoda za zdravstvenu zaštitu žena i materinstva, Studentske poliklinike, školskih dispanzera, stomatoloških ambulanti	<b>ZA</b>	<b>ZA</b>
Štednja našeg novca na školstvu i nauci	<b>ZA</b>	<b>ZA</b>
Ozakonjenje koncesija na sva javna dobra i usluge, počevši od vode	<b>ZA</b>	<b>ZA</b>
Imenovanje stranačkih pijuna za direktore javnih preduzeća	<b>ZA</b>	<b>ZA</b>
Izmjena Prostornog plana KS (period 2003-2023.) kojim svaki centimtar Kantona postaje potencijalni građevinski plac	<b>ZA</b>	<b>ZA</b>
Izdvajanje svega 1000KM za obnovu uništene vodovodne mreže, što je grad 2017. god. dovelo u stanje svakodnevnih višečasovnih redukcija	<b>ZA</b>	<b>ZA</b>
Rezanje esencijalne liste lijekova	<b>ZA</b>	<b>ZA</b>
Podrška generalnoj direktorici Kliničkog centra u Sarajevu Sebiji Izetbegović, koja rastjeruje medicinske radnike, štedi na lijekovima i liječenju, a pacijente šalje privatnicima - čime se izvlače pare iz javnog zdravstva i tako urušava jedini sistem koji može svima jednako garantovati potpunu zdravstvenu zaštitu	<b>ZA</b>	<b>ZA</b>
Uskraćivanje novca Zavodu za javno zdravstvo KS za kontrolisanje kvaliteta naše vode	<b>ZA</b>	<b>ZA</b>
Finansiranje, a onda i otkup nelegalnog Prihvatišta za napuštene i izgubljene životinje u Prači, za račun jednog od SDA-u prijateljskih biznismena, na što je utrošeno više od miliona naših para	<b>ZA</b>	<b>ZA</b>
Bacanje 40 miliona našeg novca na unaprijed propali Ski-centar "Bjelašnica-Igman", kako bi tranzicijska elita mogla prodavati i izdavati svoje apartmane ili imati utočište na čistom planinskom zraku dok se sirotinja guši u zagađenom Sarajevu	<b>ZA</b>	<b>ZA</b>

**Kako navodni raskol u sarajevskoj SDA vidi sam premijer Konaković:**

**“Mi smo se oko svega složili osim preduzeća ZOI’84.” (Skupština KS, 5. mart 2018.)**

Oko ovog preduzeća su se u SDA takođe slagali godinama, pa i decenijama, dok su iz njega bratski isisavali novac. Sadašnji, navodno epohalni politički i moralni konflikt između SDA i Konakovića ima veze isključivo s tim ko će kontrolisati direktora javnog preduzeća, koje sada ulazi u fazu definitivnog rasparčavanja i SDA-u omiljene rasprodaje dobara poput lokacija na olimpijskim planinama.

## **Ne postoji politički sukob u SDA.**

**Ne postoji razilaženje u principima ili politikama. Ne nasjedajmo na njihove priče.**

Projekat SDA i svih njenih satelita (SBB, Konaković, zavisno nezavisni, BOSS, BPS) u Sarajevu je grad kao poligon za betoniranje i nepotrebnu gradnju, mešetarenje nekretninama, rasprodaju i eksploataciju javnih dobara, isisavanje našeg novca iz budžeta.

Niko tu nije ni buntovnik ni zaštitnik običnih ljudi. Radi se o uvijek istoj interesnoj skupini tajkuna, ratnih profitera, kapitalista, gazda, koji se uvijek pred izbore malo preslože u borbi za sve veće privilegije.

**SDA i njeni sateliti savršeno su ujedinjeni u otimačini NAŠIH dobara, trošenju NAŠIH para, rastjerivanju NAŠE djece, odbacivanju NAŠIH starih i bolesnih i držanju NAS u ropskom preživljavanju od dana do dana.**

**Šta bi bio zaokret u kantonalnoj politici U INTERESU SVIH a ne moćne manjine?**

**! Momentalno obustavljanje davanja saglasnosti za megalomanske privatne ili javno-privatne ili pseudojavne građevinske zahvate;**

(npr. krađe lokacije i objekta KSC Skenderija, građenog našim parama i za naše potrebe, i njegovo pretvaranje u luksuznu privatizovanu New Skenderija za profit stranih i domaćih kapitalista; pretvaranja Marin-dvora u gradilište za 16 poslovnih nebodera koji će zjapiti prazni i poludovršeni kao i SCC, bez ikakve koristi za nas koji ovdje živimo; bagerisanja visoravni kraj Trnova radi gradnje avetinjskog turističkog naselja „Buroj ozone“)

**! Stavljanje van snage nedavno usvojenih izmjena Prostornog plana skrojenih po mjeri SDA-ovih građevinskih lobija; usklađivanje Prostornog plana s potrebama stanovništva, a ne tajkuna i špekulanata nekretninama;**

**! Momentalno i trajno obustavljanje planova ušteda u školstvu i eksperimenata koji vode stranački kontrolisanom a ne savremenom obrazovanju i odgoju u interesu djece i društva;**

**! Momentalno obustavljanje primjene plana reforme zdravstvenog sistema, koji vodi neopravdanom zatvaranju ili spajanju ustanova;**

**! Momentalna revizija kvaliteta usluga na Kliničkom centru Univerziteta u Sarajevu;**

**! Povlačenje Nacrta Zakona o birou za nezaposlene koji će bez zdravstvene zaštite ostaviti desetine hiljada već potpuno osiromašenih ljudi;**

**! Obezbjeđenje pune zdravstvene zaštite za sve jednako - što je jedina garancija potpunog, efikasnog i racionalnog javnog zdravstva**

**! Uvođenje ustavne zaštite vode, izvora i vodovodne mreže od svih vidova privatizacije;**

**! Moratorij na koncesije i javno-privatna partnerstva u sektorima od opšteg interesa**

(socijalni, zdravstveni i komunalni sektor, infrastruktura itd);

**! Hitno uvođenje mehanizama zaštite radništva u trgovačkom i uslužnom sektoru;**

(zaštita od neplaćenog prekovremenog rada i rada tokom praznika, garantovanje primjene prava na sindikalno organizovanje i štrajk, sprječavanje rada na crno, garantovanje pravičnih nadnica, garantovanje prava na bolovanje svih i prava na rad trudnica)

**! Hitna nabavka novih vozila za gradski prevoz.**